

成實論卷第十八

舍八

訶梨跋摩造

姚秦三藏鳩摩羅什譯

善覺品第一百八十三

出覺者心樂遠離若離五欲及色無色界樂
此遠離故名出覺此遠離樂無諸苦故隨貪
著有苦無貪著則樂於諸覺中二覺名樂謂
無瞋無惱覺所以者何此二覺名安隱覺如
如來品中說如來常有二覺現前謂安隱覺
及遠離覺安隱覺者即是不瞋惱覺遠離覺
者即是出覺又念此三覺則福增長亦能成
心定又心得清淨又念此三覺能障諸纏諸
纏斷故速能證斷又行者以樂遠離多集善
法故能速得解脫八大人覺者佛法中若少
欲者能得利益非多欲者知足者遠離者精

進者正憶者定心者智慧者無戲論者能得
利益非戲論者是名為八少欲名行者為修
道故必欲所須但不多求餘無用物是名少
欲知足者有人若以因緣若為持戒若令他
人心得清淨是故少取而心不以為足若人
少取心以為足是名知足有人雖取少物而
求好者是名少欲非知足也若趣得少物是
名知足問曰若取所須名少欲者一切眾生
皆名少欲以其各有所須故答曰行者以不
著心取但為用故故不多取不如世人為嚴
飾名聞長取多物問曰行者何故少欲知足
答曰於守護等中見有過患又畜無用物是
愚癡相又出家人不應積聚與白衣同以此
過故少欲知足又行者若不少欲知足則貪
心漸增為財利故求不應求又貪樂財利終

無安隱以深著故又是人出家為遠離樂以貪利故忘其所為又亦不能捨諸煩惱所以者何外物尚不能捨況內法耶又見利養是衰惱因如電害禾是故常習少欲知足又見施物難償如負債不償後受苦惱又見利養是諸佛等善人所棄如佛說我不近利養利養勿近我又此行者善法充足故捨利養如佛說諸天尚不能得出樂離樂寂滅樂真智樂如我所得故捨利養又如舍利弗說我善修無相以空三昧觀一切外萬物視之如涕唾又行者不見受欲有厭足者如飲鹹水不能除渴是故勤求智慧為足又見多欲者常發願求求多得少故常有苦又見乞求者人所輕賤不加敬仰如少欲者又出家多求非其所應人與不取則是所宜是故應行少欲

知足遠離者若於在家出家人中行身遠離於諸煩惱行心遠離是名遠離問曰行者何故遠離答曰諸出家人雖未得道以遠離為樂諸白衣等處在女色憤鬧之中終無安樂又若遠離則心易寂滅如水不擾自然澄清故行遠離又此遠離法為恒沙等諸佛所讚何以知之佛見比丘近聚落宴坐心則不悅又見比丘空處睡卧佛則心喜所以者何近聚宴坐多諸因緣散亂定心令應得不得應證不證空處睡卧雖小懈怠若起求定則散心能攝攝心能得解脫又因取相故起貪等煩惱空處無色等相煩惱易斷如火無薪則自然滅又經中說若比丘樂於眾佳樂雜言說不離眾故尚不能得愛緣解脫何況能得不壞解脫遠離行者必能俱證又如燈離風

則能明照行者如是遠離行故能逮真智精進者行者若行正勤斷不善法修集善法是中勤行故名精進如是則能得佛法利所以者何以集善法日日增長如優鉢羅鉢頭摩等隨水增長懈怠行者猶如木杵從初成來日日減盡又精進者以得利故心常歡喜懈怠行者惡法覆心恒懷苦惱又精進者於念中善法常增長無有減損又深行精進得最勝處謂諸佛道如經中佛語阿難深修精進能至佛道又精進者定心易得又鈍根精進尚於生死速得解脫利根懈怠則不能得又所有今世後世世間出世間利皆因精進一切世間所有衰惱皆因懈怠如是見懈怠過精進利益故念精進正憶者常於身受心法修正安念問曰念此四法得何等利答曰

惡不善法不來入心如善守備則惡人不入又如瓶滿更不受水此人如是善法充滿不容諸惡又若修此正憶則攝解脫分一切善法如飲海水則飲衆流以一切水在大海故又修此憶名住自在行處煩惱魔民所不能壞如鷹鷂喻又此人心安住難動如圓瓶入制又此人不久當得利益如比丘尼經中說諸比丘尼問阿難言大德我等善修念處覺異於本阿難言善此法應爾定心者若習定心得微妙利如經中說修定心者能如實知又以此人身得過人法謂身出水火飛行自在等又此人得樂乃至諸天及梵王等所不能及又此人名爲所應爲不應爲者則不爲也又善修習定則善法常增又修習定者後心不悔是人名爲得出家果亦名順佛教者

不如餘人空受供養是人能報施福餘人不能又此定心法諸佛賢聖皆所親近又能堪受一切善法又若定心能成則得聖道若不能成則生淨天謂色無色界所以者何以布施等不能得如是事謂能究竟不造諸惡如經中說若小兒從生習慈能起惡心思惡事不不也世尊此皆是定力又定心名真智慧因真智慧能盡諸行諸行盡故諸苦惱滅又行者於一切世間出世間事應念即辦不勞加功餘人尚不能發心量其所得故說定心能獲利益智慧者智者心中不生煩惱若生即滅如一滯水墮熱鐵上又智者心不起諸想若起即滅如條上露見日則晞又若有智眼能觀佛法如有目者日能爲用又智者名得佛法分如所生子得父財分又智慧者名

舍八

五之一

曰有命餘則名死又智慧者名真道人能知道故又智者知佛法味如舌根不壞能別五味又智慧者於佛法中心定不動猶如石山風不能動又智慧者名信以得四信不隨他故又得聖慧根名佛弟子餘人名外凡夫故說智者能得利益無戲論者若一異論名爲戲論如阿難問舍利弗若六觸入離欲盡滅更有餘耶舍利弗言若六觸入離欲盡滅已若有餘是不可論而汝論耶若無亦有亦無非有非無問答亦爾問曰是事何故不可論耶答曰此問實我法若一若異是故不答我無決定但五陰中假名字說若以有無等答即墮斷常若以因緣說我則非戲論又若人見衆生空法空則無戲論故說無戲論者得佛法利是名具足善覺

舍八

五之二

後五定具品第一百八十四

具善信解者行者若能好樂泥洹憎惡生死名善信解如是信解速得解脫又樂泥洹者心無所著又樂泥洹則無怖畏所以者何若凡夫心念泥洹即生驚怖我當求失問曰何因緣故信解泥洹答曰行者見世間無常苦空無我則於泥洹生寂滅想又此人本性煩惱輕微聞說泥洹則心信樂又若從善師若讀經書聞生死過患如無始經及五天使等諸經中說則厭離生死信樂泥洹具行者分如經中說五行者分一謂有信二謂心不諂曲三謂少病四曰精進五名智慧有信名於三寶四諦心無疑悔無疑悔故能速成定又有信者心多喜故能速成定又信者心調易攝故疾得定問曰若由定生慧後能斷疑今

舍八

六

云何先定已說無疑答曰以多聞故能斷所疑非得定故又生深信家與信者同事常修信心雖未得定而能不疑如是等不諂曲者以質直心無所隱藏是則易度如人向醫具說病狀則易救療少病者能初夜後夜精進不息若多病疾則妨行道精進者爲求道故常勤精進如鑽燧不息則疾得火智慧者以有智慧四事得果所謂聖道問曰念處等法亦名行者分何故但說此五法耶答曰雖俱是分此法最勝是行者所須是故獨說亦離一切惡集一切善名行者分如瞿尼沙經中說具解脫處者謂五解脫處一者若佛及尊勝比丘爲之說法隨其所聞別能通達語言義趣以通達故心生歡喜歡喜則身倚身倚則受樂受樂則心攝是初解脫處行者住此

解脫處故憶念堅強心則攝定諸漏盡滅必得泥洹二者善諷誦經三者爲他說法四者獨處思量諸法五者善取定相謂九相等皆如上說問曰佛及尊勝比丘何故爲此行者說法答曰以堪受法能獲大利是故爲說又此比丘因佛出家諸根純熟故爲說法尊勝比丘以同所業故爲說法又此行者必須聞法是故爲說又此人有淨戒等功德成就猶如完器堪任受盛故爲說法此名三慧通達語言是多聞慧通達義趣是思惟慧從此二慧能生心喜乃至攝心生如實智是名修慧此三慧有三種果謂厭離解脫又聞法讀誦爲人說法是多聞慧思量諸法名思惟慧善取定相是名修慧問曰心解脫漏盡是二有何差別答曰以定遮煩惱故說心解脫永斷

煩惱故說漏盡問曰若持戒等法亦是解脫處如說持戒則心不悔心不悔則歡喜等或因施等亦得解脫何故但說此五法耶答曰以勝故獨說又問此法有何勝耶答曰是解脫近因戒等以遠故不說又問云何知是近因答曰行者聞法知陰界入等但衆法和合中無我故則破假名破假名即是解脫故名近因又經中說多聞功德謂不隨他教心易攝等亦以此故知是近因又佛法有大功德能滅煩惱至泥洹等於此寂滅法中若聽若誦若自思量則速解脫故名近因又施得大富持戒尊貴多聞得智以智慧故得盡諸漏不以富貴故知近因又舍利弗等稱大智者皆由多聞問曰若以多聞心易攝者阿難何故初中後夜不得解脫答曰阿難頭未到枕

即得解脫是故數在希有法中何故不速又
阿難於此夜中精進小過以疲極故不得解
脫又阿難自誓我於今夜必得漏盡亦如菩
薩於道場自誓誰有此力如阿難者皆是多
聞之力無障礙者所謂三障業障報障煩惱
障若人無此三障則不墮難處若離諸難則
堪受道又此人名具足四輪謂好國土依止
善人自發正願先世福德又能成就四須陀
洹分謂親近善人喜聽正法自正憶念能隨
法行又能棄捨貪等三法如經中說不斷三
法則不能度老病死不著者不著此岸不著
彼岸不沒中流不出陸地不爲人取及非人
取不入迴瀆不自腐爛此岸謂內六入彼岸
謂外六入中流謂貪喜陸地謂我慢人取謂
與在家出家^{舍八}和合非人取謂持戒爲生天上

迴瀆謂返戒腐爛謂破重禁若人於內入計
我即於外入生我所心從內外入生貪喜故
即於中沒從此則生我慢所以者何若人著
身受有樂故人來輕毀則生憍慢如是以我
我所貪喜我慢亂其心故能成餘事問曰此
喻中以何爲水若以八直聖道爲水則不應
以內外六入爲岸貪喜等爲中流亦不應有
迴瀆腐爛若以貪愛爲水云何隨此得至泥
洹答曰以八直聖道爲水譬喻不必令盡相
似如此木若離八難必至大海比丘如是離
諸流難則隨八聖道水流入泥洹如言乳如
貝但取其色不取堅軟言面如月但取盛滿
不取形也又行者出聖道已著內外入不如
此木即於水中著此彼岸腐爛等也又論師
言如恒河水必至大海如是八聖道水必至

泥洹故以爲喻如是略說十一定具若有此
法自然得定

出入息品第一百八十五

阿那波那十六行謂念出入息若長若短念
息徧身除諸身行覺喜覺樂覺心行除心行
念出入息覺心令心喜令心攝令心解脫念
出入息隨無常觀隨斷離滅觀念入出息若
長若短問曰云何名息長短答曰如人上山
若擔重疲乏故息短行者亦爾在羸心中爾
時則短羸心者所謂躁疾散亂心也息長者
若行者在細心中則息長所以者何隨心細
故息亦隨細如即此人疲極止故息即隨細
爾時則長息徧身者行者信解身虛則見一
切毛孔風行出入除身行者行者得境界力
心安隱故羸息則滅爾時行者具身憶處覺

喜者是人從此定法心生大喜本雖有喜不
能如是爾時名爲覺喜覺樂者從喜生樂所
以者何若心得喜身則調適身調適則得猗
樂如經中說心喜故身猗身猗則受樂覺心
行者行者見喜過患以能生貪故貪是心行
從心起故以受中生貪故見受是心行除心
行者行者見從受生貪過除滅故心則安隱
亦滅除羸受故說除心行覺心者行者除受
味故見心寂滅不沒不掉是心或時還沒爾
時令喜若心還掉爾時令攝若離二法爾時
應捨故說令心解脫行者如是心寂定故生
無常行以無常行斷諸煩惱是名斷行煩惱
斷故心則厭離是名離行以心離故得一切
滅是名滅行如是次第得解脫故名十六行
念出入息問曰何故念入出息名爲聖行天

行梵行學行無學行耶答曰風行虛中虛相能速開導壞相壞相即是空空即是聖行故名聖行為生淨天故名天行為到寂滅故名梵行為得學法故名學行為無學故名無學行問曰若觀不淨深厭離身速得解脫何用修此十六行耶答曰不淨觀未得離欲息惡厭身心則迷悶如服藥過則還為病如是不淨喜生惡厭如跋求沫河邊諸比丘不淨觀故深生惡厭飲毒墜高等種種自殺此行不爾能得離欲而不生惡厭故名為勝又此行易得自緣身故不淨易失又此行細微以能自壞身故不淨行麤壞骨相難又此行能破一切煩惱不淨但破姪欲所以者何一切煩惱皆因覺生念出入息為斷諸覺故問曰出入息為屬身為屬心耶答曰亦屬身亦屬心

舍八

十一一

所以者何處胎中無故知由身若第四禪等及無心者無故知由心問曰息不故起不應由心所以者何是息不由意起如心念餘事思常出入如食自消如影自轉非人為也答曰息不故起不由憶念但以眾緣和合故起若有心則有無心便無故知由心又隨心差別麤心則短細心則長又出入息由地由心若在出入息地亦有出入息地心爾時則有出入息地所謂欲界及三禪若在出入息地而無出入息地心及在無心爾時則無若在無出入息地爾時亦無問曰息起時先出耶舍八先入耶答曰生時先出死時後入出入第四禪亦如是問曰是念出入息云何名具足答曰行者若得此十六行爾時名具足有論師言以六因緣故名具足所謂數隨止觀轉緣

十一二

清淨數名數出入息從一至十數有三種若等若過若減等謂十則數爲十過謂十一數名爲十減名數九爲十隨名行者心隨息出入觀名行者見息繫身如珠中縷止名令心住出入息轉謂轉身緣心令受緣心現前心法亦爾清淨名行者離一切煩惱諸難心得清淨此不必定所以者何是諸行中不必要用數隨二法行者但令心住息中斷諸覺故若能行十六種名爲具足又此具足相不決定鈍根所行於利根者則非具足問曰是出入息經中何故說名爲食答曰若息出入停等身得快樂如得美食益身調適故名爲食問曰此十六行中盡念出入息耶答曰是人名壞裂五陰方便若壞裂五陰除假名已更復何用念出入息是名身憶四種憶身故名

卷八

十二

身憶問曰憶緣過去息是現在何故名憶答曰是破假名智以憶名說諸心數法更相爲名如十想等亦憶先後所行故名爲憶問曰長短等中不說聖行云何無行名憶處耶經中說若行者學出入息若長若短若徧身若除身行爾時名身憶處答曰是名初方便道爲心清淨故後名斷道又此中有無常等行但此經不說餘經中說行者於出入息中觀身生相滅相及生滅想又說觀身無常等但第四中無常等行具足故說

定難品第一百八十六

是定若離障礙諸難能成大利定難者所謂麤喜如經中說我生麤喜心難法行者不應生此麤喜以有貪著等過亂定心故問曰從法生喜云何能令不生答曰行者念空則不

生喜以有衆生想故生喜五陰空無衆生云何當喜又行者應作是念以因緣故種種法生謂光明等是中何所喜耶又行者見所喜法尋皆敗壞麤喜則滅又行者更求大事不以光明等法爲是故不生喜又行者見滅相利故不以光明等相爲喜又此行者修習寂滅欲盡煩惱故不生喜以此等緣能滅麤喜又有怖畏定難行者見可畏緣故生怖畏世間所有可怖畏處行者悉見於此事中皆應諦觀無常敗壞不應隨也所以者何坐禪法中有此因緣見可畏事不可以此而生怖畏是事虛妄皆空如幻能誑凡夫非真實也如是思惟則離怖畏又依空法則無怖畏又作是念我行力故感此異相不應怖畏又自念身有戒聞等功德具足無可加害因緣故不

怖畏又此行者樂道深故不惜身命何所怖畏又此人心常處正念是故怖畏不能得便又念勇悍相故不怖畏怖畏是怯弱相以如是等滅除怖畏又有不適定難謂行者有冷熱等病若疲極失眠諸因緣故令身不適有貪憂嫉妬等諸煩惱令心不適則失禪定是故行者應自將護身心令其調適又有異相定難所謂垢相亦有非垢相能亂禪定如布施等相又有不等定難所謂精進若疾若遲疾則身心疲極遲則不取定相俱退失定如捉鳥子急則疲極緩則飛去又如調絃若急若緩俱不成音又精進若速則難究竟如佛語阿那律汝精進過必當懈怠所以者何若精進過則事不成還墮懈怠精進若遲事亦不辦是故不等名爲定難又有無念定難謂

不念善法設念善法則非所受又不念定相而念外色是名不念行者應一心精進念所受法如擎油鉢又有顛倒定難謂多欲人受行慈心多瞋恚人修習不淨上二種人觀十二因緣又沒心中修止掉心中行精進是二心中行捨是名顛倒又有多語定難謂多覺觀覺觀是語言因故又心不樂住強繫在緣又有不取相定難相有三種所謂止相進相捨相又有三相謂入定相住相起相行者不善分別如是等相以失禪定又有慢定難若謂我能入定彼不能入是名憍慢若謂彼能而我不能是名不如慢若未得定自謂爲得是增上慢於不妙定而生妙想是名邪慢又貪等法亦名定難如經中說若行者一法成就則不能觀眼無常所謂貪也問曰一切未

離欲人皆不能觀眼無常耶答曰此言少失應說現在起貪不能觀眼無常又成就中而有差別有人貪等厚重常來在心則能障定若薄而不能常則不能爲難又經中說十三惡法皆名定難十三白法皆是順定所謂佛言若不斷三法則不能度老病死謂貪恚癡若不斷三法則不能斷貪恚癡謂身見戒取疑次有三法謂邪念邪行沒心次有三法謂妄憶不安慧亂心次有三法謂調戲不守諸根破戒次有三法謂不信邪戒懈怠次有三法謂不喜善人惡聞正法喜出他過次有三法謂不恭敬難可與語習惡知識若不斷三法則不能斷不恭敬難與語惡知識謂無慙無愧放逸若能斷無慙無愧放逸則能斷不恭敬難與語習惡知識乃至能斷身見戒取

疑則能斷貪恚癡度老病死是中度老病死
謂無餘涅槃斷貪恚癡謂阿羅漢果有餘泥
洹斷身見戒取疑謂三沙門果斷邪念邪行
沒心謂在暖等達分善根斷妄憶念不安慧
亂心謂修四憶念處斷調戲不守諸根破戒
謂受出家戒斷不喜善人惡聞正法喜出他
過不信邪戒懈怠不恭敬難可與語習惡知
識無慙無愧放逸謂在家清淨所以者何若
人獨處爲惡不羞是名無慙此人於後惡心
轉增衆中爲惡亦無所耻是名無愧失善法
本二白法故常隨惡法是名放逸以成就此
三惡法故不受所尊師長教誨名無恭敬友
友師教名難與語如是則遠離師長親近惡
人名習惡知識於此中從無慙生無恭敬從
無愧生難與語從放逸生習惡知識故爲不

信受邪戒法常爲懈怠習近惡人教令不信
言爲惡無報或聞行惡得報即便受行雞狗
等法望速畢罪受行此法不覺有利故生懈
怠以懈怠故不喜善人謂無真實行正行者
亦惡聞正法謂行正法皆如邪法無所利益
以心濁故善出他過謂他行法皆如自己都
無所得如是不能制煩惱故心則戲調以戲
調故不攝諸根則能破戒以破戒故妄生憶
念行不安慧心志散亂便生邪念生邪念故
便行邪道行邪道時不得利故心則迷沒心
不明故不斷三結不斷三結故不能斷貪等
煩惱病等諸衰與此相違名爲白法又有愁
憂定難行者生念我於爾所年月歲數不能
得定故生愁憂又貪著喜味亦是定難又有
不樂定難雖得好處善師等緣心亦不樂又

貪等諸蓋皆名定難取要言之乃至衣服飲食等法減損善根增長不善皆名定難應當覺知勤求捨離

止觀品第一百八十七

問曰佛處處經中告諸比丘若在阿蘭若處若在樹下若在空中舍應念二法所謂止觀若一切禪定等法皆悉應念何故但說止觀答曰止名定觀名慧一切善法從修生者此二皆攝及在散心聞思等慧亦此中攝以此二事能辦道法所以者何止能遮結觀能斷滅止如捉草觀如鎌刈止如掃地觀如除糞止如揩垢觀如水洗止如水浸觀如火熟止如附癰觀如刀決止如起脉觀如刺血止制調心觀起沒心止如灑金觀如火炙止如牽繩觀如用剗止如鑷鑷刺觀如剪刀剪髮止如

金八

十七

器鉀觀如兵仗止如平立觀如發箭止如服膩觀如投藥止如調泥觀如印印止如調金觀如造器又世間衆生皆墮三邊若苦若樂止能捨樂觀能離苦有七淨中戒淨心淨名止餘五名觀八大人覺中六覺名止二覺名觀四憶處中三憶處名止第四憶處名觀四如意足名止四正勤名觀五根中四根名止慧根名觀力亦如是七覺分中三覺分名止三覺分名觀念則俱隨八道分中三分名戒二分名止三分名觀戒亦屬止又止能斷貪觀除無明如經中說修止則修心修心則貪愛斷修觀則修慧修慧則無明斷又離貪故心得解脫離無明故慧得解脫得二解脫更無餘事故但說二問曰若止觀能修心修慧修心慧故能斷貪及無明何故定說止能修

心能斷貪愛觀能修慧能斷無明答曰散心者諸心相續行色等中此相續心得止則息故說止能修心從息心生智故說觀能修慧以生觀已後有所修皆名修慧初慧名觀後名爲慧如經中說修止斷貪是說遮斷何以

知之色等外欲中生貪若得止藥則不復生如經中說行者得淨喜時捨不淨喜若說無明斷是究竟斷何以知之無明斷故貪等煩惱斷滅無餘經中亦說離貪故心得解脫是名遮斷離無明故慧得解脫是畢竟斷有二種解脫時解脫不壞解脫時解脫是遮斷不壞解脫是畢竟斷問曰時解脫是五種阿羅漢無漏解脫不壞解脫是不壞法阿羅漢無漏解脫何故但說遮斷耶答曰此非無漏解脫所以者何時解脫名但以上力少時遮結

舍八

十八

而未能求斷後則還發故非無漏又此解脫名時愛解脫漏盡阿羅漢無所可愛問曰若爾則無聖所愛戒答曰以諸學人漏未盡故我心時發是故於戒生愛非阿羅漢我心求滅而生愛也問曰瞿提阿羅漢於時解脫六反退失恐第七退故以刀自害若失有漏不應自害故知時解脫不名有漏答曰此人退失所用斷結禪定於此定中六反退失第七時還得此定便欲自殺爾時尋得阿羅漢道是故魔王謂學人死繞屍四邊徧求其識來白佛言世尊云何汝弟子未漏盡而死佛言此人已拔愛根得入泥洹問曰若斷貪名遮斷者經中說從貪心得解脫從恚癡慧得解脫又說斷貪喜故心得好解脫又說從欲漏心得解脫如是皆應名遮解脫非實解脫答

曰是中亦說無明斷故知是畢竟解脫若說斷貪或是遮斷或畢竟斷若不生真智則是遮斷隨生真智是畢竟斷無有用止能畢竟斷貪若然者外道亦能畢竟斷貪而實不然故知但是遮斷問曰經中說以止修心依觀得解脫以觀修心依止得解脫是事云何答曰行者若因禪定生緣滅智是名以止修心依觀得解脫若以散心分別陰界入等因此得緣滅止是名以觀修心依止得解脫若得念處等達分攝心則俱修止觀又一切行者皆依此二法得滅心解脫

修定品第一百八十八

問曰汝言應修習定是定心心念念生滅云何可修答曰現見身業雖念念滅以修習故有異伎能隨修習久轉轉便易口業亦爾隨所

轉習學轉增調利堅固易憶如讀誦等當知意業雖念念滅亦可修習如火能變生水能決石風能吹物如是念念滅法皆有集力又隨習煩惱則隨熾盛如人世世修習姪心則成多欲恚癡亦爾如經中說若人隨念何事心則隨向如常隨欲覺心則向欲二覺亦爾故知此心雖念念滅亦可修習又修名增長現見諸法皆有增長如經中說行者以邪念故欲等諸漏未生則生生者增長謂從下生中從中生上如種芽莖節華葉果實現見從因漸次增長定慧等法亦應如是又現見熏麻其香轉增是香及麻念念不住而有熏力故知念念滅法亦可修習問曰麻是住法華香來熏無有住心以念念滅智而來修習云何為喻答曰無有住法一切諸法皆念念滅

此事先成故非難也。又若法不念念滅則無修習。即體常住。修何所益。若法念念生滅。以下中上法。故有修習。問曰。諸華到麻。能熏智不及心。故無修習。答曰。先業喻中。是事已明。所謂後業不到。先業先語。不待後語。而身口業亦有修相。是故汝言不到不修。不名為難。又現見因果。雖不同時。亦得從因有果。如是心法。雖念念滅。亦有修習。又如種得水。雖不到芽等。亦能令芽等滋茂。如是智慧修習。先心後心。增長問曰。若麻念念滅。則異麻生。是麻為熏生。為不熏生。若不熏生。終無有熏。若熏生者。復何用久熏。答曰。以因熏。故如種得水。則芽滋茂。如是因先華合。而異麻生。是則熏生。汝言何用久熏。如汝經中說。因火合法。微塵黑相滅。赤相生。若初火合法。滅黑相者。

不應更生黑相。若初火合法。生赤相者。復何須後火合法。若初火合時。黑相生。赤相終不應生。若第二時。赤相生。復何須久與火合。若汝意謂。赤相漸生。心亦如是。有何咎耶。壞等亦爾。又諸法雖有因緣。亦次第生。如受胎等。漸漸成身。如種根等。亦漸次生。如是定慧等法。雖念念滅。亦以下中上法。次第而生。又修法微細異心。相續如羽毛。暖微。卵則漸變。掌肌。暖故。斧柯微盡。心亦如是。定慧妙故。漸次修習。又修習法時。到乃知。如偈中說。一分從舍八頗受一分。因友得一分。自思惟一分。待時熟。若人雖復終日讀誦。不能明了。如時熟者。如以多華一時熏麻。不如少華漸漸久熏。膏潤水浸累。牆壁等。皆亦如是。現見種根芽等。增長微細。尚不能見。日日所長。如毫末許。小兒

等身酥乳等熟亦復如是故知修法微妙難覺問曰或見有法一時頓集有人先不見色見即染著亦有少時多所通達何故但說漸次修習答曰皆是過去曾修習故故知積習以漸此事已明又非但發心能有所成如經中說若於善法不勤修習而但願欲不受諸法於諸漏中心得解脫是人所念終不從願以不能勤修善法故行者若能勤修善法雖不發願亦於諸漏心得解脫以從因生果不須願故猶如鳥雀要須抱卵不以願故禽從穀出又不以願故燈明清淨要須備具清油淨炷無物觸動其明乃淨又非但願故能得嘉穀必須良田好種時澤調適農功具足乃有所獲又不但願故身得色力要服良藥餽饌等緣乃得充滿如是非但願故能得漏盡

要須真智乃得解脫何有智者知從因生果而捨其因從餘求果又修習法現見果報如經中佛說且置七日我教弟子乃至須臾修習善法於無量歲常得受樂又諸比丘尼語大德阿難我等善修念處覺異於初又經中佛告諸比丘若人無諂曲心來至我所我朝為說法令夕得利夕為說法令晨得利又若人得阿羅漢道無他人與亦非非人與但修正因故獲斯利又無上佛道尚以積習善法故得況餘事耶如經中說佛語比丘我依二法得無上道一者樂善無厭二者修道不倦食人佛於善法終無齊限又諸菩薩雖不得定亦不懈倦所以者何若不為善則無所獲為善亦不相代不為善者終無安隱思量此已則勤精進修習善法若發精進或得或失不精

進者求無得望是故應勤修習勿生懈怠又智者究竟必應解脫若離修習更無方便是故智者當勤修習勿生懈怠又行者念行正行必有果報故雖未便得不以爲憂又行者應念我已曾得修習果報以衆生昔來皆得一切諸禪定故我今正修亦必當得故不厭倦又正行者佛爲作證我今正行故知必得又我得道因緣具足謂得人身諸根完具明識罪福亦信解脫遇善知識具此等緣云何不得修習果報又正行精進終不唐棄故不厭倦又煩惱斷細微難覺如柯漸盡我諸煩惱亦當有斷但以細故不能盡覺故知修善精進爲最又少智尚能破諸煩惱如少光明亦能除闇如是但得少智則爲事辦故不厭倦又久而難成所謂得定若得定已則餘功

食八

五三

未幾是故雖不速得終不厭倦又行者應念得定甚難如昔菩薩福慧深厚精勤六年爾乃逮得及餘比丘得定亦難況我凡人薄福鈍根而能疾得如是念已不生疲厭又諸行人必應爲者所謂修定更無餘業故得與不得要當修習又修習者雖不得定亦名得身遠離身遠離已定則易得又若勤修定則不負佛恩亦以行遠離故得名行者又修習善久則成善性乃至轉身善常隨逐故能常與善人相遇是爲大利又常修善者或於現身必得漏盡若死時得若命終已化生善處於彼間得如聞法利中說又行者內心發勇猛相作如是念我若不壞煩惱障者終不空返又行者依憍慢心生如是念他人有信等善根故能得定我今亦有何爲不得如昔菩薩

從阿羅邏等仙人聞法作如是念是人
有信等善根故能得法我今亦有何故
不得又行者知煩惱劣弱智慧力強斷
之何難如說比丘成就六法能以口風
吹散雪山況死無明又行者生念我於
宿世不修定故今不能得今若不勤後
復不得故應勤習又常修定故心得住
處如瓶轉不止必得住處又行者生念
我若常勤精進若得不得後必不悔故
應一心勤修諸定

成實論卷第十八

舍八

音釋

二十四

鷄當括切又知鑽鑽祖官切燧徐醉切
悍侯肝切性也鑽鑽力也切刻楚限切鑷尼輒切
也鉅與甲同穀克角切銷與銷同鑷何交切
銷與銷同鑷何交切日
銷與銷同鑷何交切日
美與銷同鑷何交切日